

四庫全書

史部

欽定四庫全書

史部

西漢會要卷二十四至
九

詳校官編修臣范來宗

編修臣程嘉謨覆勘

總校官知縣臣楊懋珩

校對官編修臣廬遜

謄錄監生臣吳拱極

欽定四庫全書

西漢會要卷二十四

宋 徐天麟 撰

輿服下

天子冠服

高祖以竹皮為冠令求盜之薛治時時冠之及貴常冠所謂劉氏冠也八年令爵非公乘以上毋得冠劉氏冠

本紀臣天麟按後漢輿服志云劉氏冠楚冠制也祀宗廟諸祀則冠之此冠高祖所造故以為祭服尊敬之謂

也

高皇帝所述書天子所服第八

天子衮服之制也於施行詔書第八

曰大

謁者臣章受詔長樂宮曰令羣臣議天子所服相國臣

何等議曰春夏秋冬天子所服當法天地之數中得人

和臣請法之中謁者趙堯舉春李舜舉夏兒湯舉秋貢

禹舉冬四人各職一時大謁者襄奏制曰可

魏相傳服虔曰主一時衣

服禮物朝

祭百事

文帝身衣弋綈

本贊又賈誼云帝之身自衣皂綈

孝文身衣弋絺足履革舄以韋帶劍莞蒲為席兵木無

办衣縕無文

東方朔傳

聖文躬服節儉絺衣不敝革鞜不穿

楊雄傳

昭帝元鳳四年帝加元服

本紀師古曰元尊也冠者首之所著故曰元服

皇太后賜御府衣迎宣帝

紀按少府屬官有御府令主天子衣服

元帝初元五年罷齊三服官

紀李斐曰齊國舊有三服官春獻冠幘縱為首服綺

素為令服輕綃為夏服臣天麟按貢禹傳禹奏故齊三服官輸物不過十笥方今齊三服官作工各數千人一

歲費數鉅萬天子納其言罷齊三服官

百官冠服

爵非公乘以上毋得冠劉氏冠

見上

景帝中六年詔曰吏者民之師也車駕衣服宜稱亡度者或不吏服出入閭里與民無異令長吏車騎從者不稱其官衣服下吏出入閭巷亡吏體者二千石上其官屬三輔舉不如法令者

紀

皂衣

谷永傳曰陛下擢之皂衣之吏蕭望之曰張敞備皂衣二十餘年如淳曰雖有五時服至朝皆着皂

衣

直指使者衣繡衣持斧

武紀

柱後惠文

張敞傳當以柱後惠文彈治之耳晉灼曰漢時法冠也一號柱後惠文以纚裏鐵柱卷秦

制執法服今御史服之獬廌一角今冠兩角以獬廌為名耳師古曰纚即今日方紗也山爾反卷去權反

郎侍中皆鵄鵄冠貝帶

倭幸傳師古曰以鵄鵄毛羽飾冠司馬相如傳師古曰鵄鵄鷩鷩

鳥也似山鷄而小鷄背毛黃腹下赤項綠色其尾毛紅赤光彩鮮明今俗呼為山鷄其實非也

貂羽黃金附蟬

燕王旦傳注云侍中之飾

司隸冠進賢冠

百官表

仄注冠

五行志李奇注云仄注冠曰高山冠齊冠也謁者服

皮弁素績

孝平王后傳劉歆以下四十九人賜皮弁素績師古曰皮弁以鹿皮為冠形如人手之弁

合也素績謂素裳也朱衣而素裳字或作績績謂襪績之若今之撰為也

方山冠

五行志鄧展曰方山冠以五絲縠為之樂舞人所服

雜錄

武安侯田恬坐衣襜褕入宮不敬免

外戚表師古曰襜褕直裾裋衣

朱博為刺史敕功曹官屬多褻衣大褱不中節度自今

掾吏衣皆令去地三寸

傳

叔孫通儒服漢王憎之迺變其服服短衣楚製

傳

婁敬見高祖虞將軍欲與鮮衣敬曰臣衣帛衣帛見衣

褐衣褐見不敢易衣

婁敬傳

江充召見願以所常被服冠見武帝許之充衣紗縠禪

衣曲裾後垂交輸冠禪纚步搖冠飛翾之纓

傳

雋不疑見暴勝之冠進賢冠帶櫛具劍佩環玦褰衣博

帶盛服至門上謁

傳

董偃綠幘傳鞬

東方朔傳應劭曰宰人服也韋昭曰鞬形如射鞬以縛左右手於事便也師古

曰綠幘賤人之服也傳着也即今之臂鞬也

臣庶衣服

漢初定與民無禁

叙傳師古曰國家不設車旗衣服之禁

高祖八年賈人毋得衣錦繡綺縠絺紵罰

紀

文帝時賈誼上疏言今民賣僮者為之繡衣絲履偏諸緣內之閑中是古天子后服所以廟而不宴者也而庶人得以奴婢妾白縠之表薄綺之裏縋以偏諸美者黼繡是古天子之服今富人大賈嘉會召客者以被牆庶人屋壁得為帝服倡優下賤得為后飾帝之身自衣阜

綈而富民牆屋被文繡天子之后以緣其領庶人孽妾緣其履此臣所謂舛也

傳

成帝永始四年詔公卿列侯多畜奴婢被服綺縠車服過制申敕有司以漸禁之青綠民所常服且勿止

紀

成帝微行私奴客皆白衣袒幘帶刀持劍

百官志

白衣

龔勝傳師古曰白衣給官府趨走賤人若今諸司亭長掌固之屬

璽

漢元年十月沛公至霸上秦王子嬰封皇帝璽符節降

枳道旁

本紀又霍光傳注云漢初有三璽天子之璽自佩行璽信璽在符節臺又漢舊儀云皇帝六璽

皆白玉螭虎紐文曰皇帝行璽皇帝之璽皇帝信璽天子行璽天子之璽天子信璽

代王至周勃跪上天子璽

文帝紀

符璽御史

周昌傳趙堯為符璽御史百官表去其御史尚符璽者有印綬

霍光輔少主殿中嘗有怪一夜羣臣相驚光召尚符璽

郎

恐有變難欲收取璽

郎不肯授光欲奪之郎按劍曰臣頭可

得璽不可得也

光傳

霍光奏昌邑王受皇帝信璽行璽大行前就次發璽不

封光傳

初高祖入咸陽至霸上秦王子嬰降於軺道奉上始皇璽及高祖誅項籍即天子位因御服其璽世世傳受號曰漢傳國璽以孺子未立璽藏長樂宮及莽即位請璽太后不肯授莽莽使安陽侯舜諭旨舜素謹敕太后雅愛信之舜既見太后知其為莽求璽怒罵之曰而屬父子宗族蒙漢家力富貴累世既無以報受人孤寄乘便利時奪取其國不復顧恩義人如此者狗豬不食其餘

天下豈有而兄弟邪且若自以金匱符命為新皇帝變
更正朔服制亦當自更作璽傳之萬世何用此亡國不祥
璽為而欲求之我漢家老寡婦旦暮且死欲與此璽俱
葬終不可得太后因涕泣而言旁側長御以下皆垂涕
舜亦悲不能自止良久迺仰謂太后臣等已無可言者
莽必欲得傳國璽太后寧能終不與邪太后聞舜語切
恐莽欲脅之迺出漢傳國璽投之地以授舜曰我老已
死知而兄弟令族滅也舜既得傳璽奏之莽大說迺為

太后置酒未央宮漸臺大縱衆樂

元后傳

羣臣璽綬

印

諸侯王金璽璽綬

璽音戾綠也漢舊儀云諸侯王黃金璽素綬紐文曰璽

相國丞相金印紫綬高帝十一年更名相國綠綬

太師太傅太保太尉左右前後將軍金印紫綬

御史大夫銀印青綬

凡吏秩比二千石以上皆銀印青綬光祿大夫無秩比六百以上皆銅印黑綬大夫博士御史謁者郎無其僕

射御史治書尚符璽者有印綬比二百石以上皆銅印

黃綬綬和元年長相皆黑綬建平二年復黃綬

百官表

武帝太初元年改正朔數用五

紀注云謂印文也若丞相曰丞相之印章諸卿

及守相印文不足五字者以之足之

楊僕懷銀黃垂三組

銀銀印也黃金印也僕懷三印故三組也

宣帝始賜單于印璽與天子同

食貨志上

匈奴故印文曰匈奴單于璽

本傳王莽更曰新匈奴單于章

方寸之印丈二之組鎮撫海內

嚴助傳

印敦

陳遵傳謂印之組也

符節

天子璽符節

高紀師古曰符謂諸所合符以為契者也節以毛為之上下相重取象竹節將命者

持之以為信

高祖與功臣剖符作誓

紀

文帝二年初與郡守為銅虎符竹使符

紀應劭曰銅虎符第一至第五

國家當發兵遣使者至郡合符符合乃聽受之竹使符皆以竹箭五枚長五寸鐫刻篆書第一至第五張晏曰符以代古之珪璋從簡易也師古曰與郡守為符者謂各分其半右留京師左以與之使音所吏反

武帝征和二年更節加黃旌初漢節純赤以戾太子持

赤節故更為黃旌加上以相別

本紀及劉屈氂傳

少府屬官有符節令丞

百官表

襄平侯紀通尚符節

呂后紀

齊王欲發兵誅諸呂魏勃曰王欲發兵非有漢虎符驗

也

高五王傳

七國敗弓高侯誥膠西王卬曰未有詔虎符擅發兵王

其自圖之

吳王濞傳

武帝曰吾新即位不欲出虎符發兵郡國

嚴助傳

御史中丞劾馮野王持虎符出界歸家遂免

傳

淮南王盜寫虎符

賈捐之傳

閩越王弟餘善殺王以降遣使者上符節請所立

嚴助傳

伍符

馮唐傳伍伍相保之符也

衛太子擅發兵盧賀坐受太子節掠死

功臣表

任安坐受太子節懷二心要斬

劉屈氂傳

霍光奏昌邑王自之符璽取節十六朝暮臨從官持節

從傳

關傳

文帝十二年除關無用傳

本紀張晏曰傳信也若今過所也師古曰古者或用幣或

用繒帛幣者刻木為合符也

景帝四年復置諸關用傳出入

紀應劭曰以吳國新反備非常

宣帝本始四年詔曰今歲不登民以車船載穀入關者

得毋用傳

紀

霍成詐刻傳出關

本傳

終軍從濟南當詣傳士步入關關吏予軍繻軍問以此
何為吏曰為復傳還當以合符軍曰大丈夫西游終不
復傳還棄繻而去軍為謁者使行郡國建節東出關吏
識之曰此使者迺前棄繻生也

本傳

欽定四庫全書

正陽會要
卷二十四

西漢會要卷二十四

欽定四庫全書

西漢會要卷二十五

宋 徐天麟 撰

學校上

大學

高祖尚有干戈平定四海未遑庠序之事

儒林傳序

武帝興大學

本贊臣天麟按三輔黃圖云太學在長安西北七里市有獄

董仲舒對策曰養士之大者莫大乎大學大學者賢士

欽定四庫全書

西漢書要
卷二十五

之所關也教化之本原也願陛下興大學置明師以養天下之士武帝立學校之官皆自仲舒發之

本傳

元朔五年制曰蓋聞導民以禮風之以樂婚姻者居室之大倫也今禮廢樂崩朕甚愍焉故詳延天下方聞之士咸登諸朝其令禮官勸學講義洽聞舉遺興禮以為天下先太常議予博士弟子崇鄉里之化以厲賢材焉謹與太常臧博士平等議曰聞三代之道鄉里有教夏曰校殷曰序周曰庠其勸善也顯之朝廷其懲惡也加

之刑罰故教化之行也建首善自京師始繇內及外今
陛下昭至德開大明配天地本人倫勸學興禮崇化厲
賢以風四方太平之原也古者政教未洽不備其禮請
因舊官而興焉為博士官置弟子五十人復其身太常
擇民年十八以上儀狀端正者補博士弟子郡國縣官
有好文學敬長上肅政教順鄉里出入不悖所聞令相
長丞上屬所二千石二千石謹察可者常與計偕詣太
常得受業如弟子一歲皆輒課能通一藝以上補文學

掌故闕其高第可以為郎中太常籍奏即有秀才異等輒以其名聞其不事學若下材及不能通一藝輒罷之而請諸能稱者臣謹按詔書律令下者明天人分際通古今之誼文章爾雅訓辭深厚恩施甚美小吏淺聞弗能究宣亡以明布諭下以治禮掌故以文學禮義為官遷留滯請選擇其秩比二百石以上及吏百石通一藝以上補左右內史大行卒史比百石以下補郡太守卒史皆各二人邊郡一人先用誦多者不足擇掌故以補

中二千石屬文學掌故補郡屬備員請著功令他如律
令制曰可自此以來公卿大夫士吏彬彬多文學之士
矣昭帝時舉賢良文學增博士弟子員滿百人宣帝末
增倍之元帝好儒能通一經者皆復數年以用度不足
更為設員千人郡國置五經百石卒史成帝末或言孔
子布衣養徒三千人今天子大學弟子少於是增弟子
員三千人歲餘復如故平帝時王莽秉政增元士之子
得受業如弟子勿以為員歲課甲科四十人為郎中乙

科二十人為太子舍人丙科四十人補文學掌故云

儒林

傳序

武帝立五經博士開弟子員設科射策訖於元始一經

說至百餘萬言大師衆至千餘人

儒林傳贊

元帝初元五年罷博士弟子毋置員以廣學者永光三

年冬復博士弟子員

紀

辟廡

武帝封泰山還兒寬上壽曰間者聖統廢絕陛下發憤

祖立明堂辟廱

兒寬傳師古曰祖始也

河間獻王來朝獻雅樂對三雍宮

景十三王傳應劭曰辟廱明堂靈臺也雍

和也言天地君

臣人民皆和也

成帝時犍為郡於水濱得古磬十六枚劉向因是說上
宜興辟廱設庠序陳禮樂隆雅頌之聲盛揖遜之容以
風化天下成帝以向言下公卿議會向病卒丞相大司
空奏請立辟廱案行長安城南營表未作遭成帝崩羣
臣引以定謚及王莽為宰衡欲耀衆庶遂興辟廱因以

篡位世祖中興迺營立明堂辟廱顯宗即位躬行其禮

養三老五更於辟廱威儀既盛美矣

禮樂志臣天麟按三輔黃圖漢辟廱

在長安西北七里河間獻王來朝獻雅樂武帝對之三雍宮即此

平帝元始五年劉歆

孔永孫遷平晏四人使治明堂辟廱得萬國驩心侯各

千戶

恩澤侯表

郡國學

文翁為蜀郡守仁愛好教化見蜀地僻陋有蠻夷風文翁欲誘進之乃選郡縣小吏開敏有材者張叔等十餘

人親自飭屬遣詣京師受業博士或學律令減省少府
用度買刀布蜀物齎計吏以遺博士數歲蜀生皆成就
還歸文翁以為右職用次察舉官有至郡守刺史者又
修起學宮於成都市中招下縣子弟以為學官弟子為
除更繇高者以補郡縣吏次為孝弟力田常選學官僮
子使在便坐受事每出行縣益從學官諸生明經飭行
者與俱使傳教令出入閭閻縣邑吏民見而榮之數年
爭欲為學官弟子富人至出錢以求之繇是大化蜀地

欽定四庫全書

四庫全書
卷二十五

學於京師者比齊魯焉至武帝時乃令天下郡國皆立
學校官自文翁為之始云

循吏傳

元帝郡國置五經百石卒史

儒林序

平帝元始三年立學官郡國曰學邑侯國曰校校學置
經師一人鄉曰庠聚曰序序庠置孝經師一人

紀

何武為刺史行部必先即學宮見諸生試其誦論問以

得失

武傳

圖書上

漢興改秦之敝大收篇籍廣開獻書之路迄孝武世書
缺簡脫禮壞樂崩聖上喟然而稱曰朕甚憫焉於是建
藏書之策置寫書之官下及諸子傳說皆充秘府至成
帝時以書頗散亡使謁者陳農求遺書於天下詔光祿
大夫劉向校經傳諸子詩賦步兵校尉任宏校兵書太
史令尹咸校術數侍醫李柱國校方技每一書已向輒
條其篇目撮其指意錄而奏之會向卒哀帝復使向子
侍中奉車都尉歆卒父業歆於是總羣書而奏其七畧

故有輯畧有六藝畧有諸子畧有詩賦畧有兵書畧有

術數畧有方技畧今刪其要以備篇籍

藝文志
下同

凡易十三家二百九十四篇易道深矣人更三聖世歷
三古及秦燔書而易為筮卜之事傳者不絕漢興田何
傳之迄於宣元有施孟梁丘京氏列於學官而民間有
費高二家之說劉向以中古文易經校施孟梁丘經或
脫去无咎悔亡唯費氏經與古文同

凡書九家四百一十二篇書之所起遠矣至孔子纂焉

上斷於堯下迄於秦凡百篇而為之序言其作意秦燔
書禁學濟南伏生獨壁藏之漢興亡失求得二十九篇
以教齊魯之間訖孝宣世有歐陽大小夏侯氏立於學
宮古文尚書者出孔子壁中武帝末魯共王壞孔子宅
欲以廣其宮而得古文尚書及禮記論語孝經凡數十
篇皆古字也共王入往其宅聞鼓琴瑟鐘磬之音於是
懼乃止不壞孔安國孔子後也悉得其書以考二十九
篇得多十六篇安國獻之遭巫蠱事未列於學宮劉向

以中古文校歐陽大小夏侯三家經文酒誥脫簡一名
誥脫簡二率簡二十五字者脫亦二十五字簡二十二
字者脫亦二十二字文字異者七百有餘脫字數十書
者古之號令號令於衆其言不立具則聽受施行者弗
曉古文讀應爾雅故解古今語而可知也

凡詩六家四百一十六卷漢興魯申公為詩訓故而齊
轅固燕韓生皆為之傳或取春秋宋雜說咸非其本義
與不得已魯最為近之三家皆列於學官又有毛公之

學自謂子夏所傳而河間獻王好之未得立

凡禮十三家五百五十五篇漢興魯高堂生傳士禮十七篇訖孝宣世后倉最明戴聖慶普皆其弟子三家立于學官禮古經者出於魯淹中及孔氏學七十篇文相似多三十九篇及明堂陰陽王史氏記所見多天子諸侯卿大夫之制雖不能備猶瘡倉等推士禮而致於天子之說

凡樂六家百六十五篇漢興制氏以雅樂聲律世在樂

官頗能紀其鏗鏘鼓舞而不能言其義六國之君魏文侯最為好古孝文時得其樂人竇公獻其書乃周官大宗伯之大司樂章也武帝時河間獻王好儒與毛生等共采周官及諸子言樂事者以作樂記獻八佾之舞與制氏不相遠其內史丞王定傳之以授常山王禹禹成帝時為謁者數言其義獻二十四卷記劉向校書得樂記二十三篇與禹不同其道寢以益微

凡春秋二十三家九百四十八篇周室既微載籍殘缺

仲尼與左丘明觀魯史記因興以立功就敗以成罰丘明論本事而作傳及末世有公羊穀梁鄒夾之傳四家之中公羊穀梁立於學官鄒氏無師夾氏未有書

凡論語十二家二百二十九篇漢興有齊魯之說傳齊論者昌邑中尉王吉少府宋畸御史大夫貢禹尚書令五鹿充宗膠東庸生唯王陽名家傳魯論語者常山都尉龔奮長信少府夏侯勝丞相韋賢魯扶卿前將軍蕭望之安昌侯張禹皆名家張氏最後而行於世

凡孝經十一家五十九篇漢興長孫氏博士江翁少府
后倉諫大夫翼奉安昌侯張禹傳之各自名家經文皆
同唯孔氏壁中古文為異父母生之續莫大焉故親生
之膝下諸家說不安處古文字讀皆異

凡小學十家四十五篇古者八歲入小學故周官保氏
掌養國子教之六書謂象形象事象意象聲轉注假借
造字之本也漢興蕭何草律亦著其法曰太史試學童
能諷書九千字以上乃得為史又以六體試之課最者

以為尚書御史史書令史吏民上書字或不正輒舉劾
六體者古文奇字篆書隸書繆篆蟲書皆所以通知古
今文字摹印章書幡信也漢興閭里書師合蒼頡爰歷
博學三篇斷六十字以為一章凡五十五章并為蒼頡
篇武帝時司馬相如作凡將篇無復字元帝時黃門令
史游作急就篇成帝時將作大匠李長作元尚篇皆
蒼頡中正字也凡將作則頗有出矣至元始中召天下
通小學以百數各令記字於庭中楊雄取其有用者以

作訓纂篇順續蒼頡又易蒼頡中重複之字凡八十九
章臣復續楊雄作十二章凡一百二章無復字六藝羣
書所載畧備矣蒼頡多古字俗師失其讀宣帝時召齊
人能正讀者張敞從受之傳至外孫之子杜林為作訓
故并列焉

凡六藝一百三家三千一百二十三篇

西漢會要卷二十五

欽定四庫全書

西漢會要卷二十六

宋 徐天麟 撰

學校下

圖書下

儒五十三家八百三十六篇

道三十七家九百九十三篇

陰陽二十一家三百六十九篇

法十家二百一十七篇

名七家三十六篇

墨六家八十六篇

從橫十二家百七篇

雜二十家四百三篇

農九家百一十四篇

小說十五家千三百八十篇

凡諸子百八十九家四千三百二十四篇

賦二十家三百六十一篇

賦二十一家二百七十四篇

賦二十五家百三十六篇

雜賦十二家二百三十三篇

歌詩二十八家三百一十四篇

凡詩賦百六家十三百一十八篇

兵權謀十三家二百五十九篇

兵形勢十一家九十二篇圖十八卷

陰陽十六家二百四十九篇

兵技巧十三家百九十九篇

凡兵書五十三家七百九十篇圖四十三卷漢興張良韓信序次兵法凡百八十二家刪取要用定著三十五家諸呂用事而盜取之武帝時軍政楊僕据撫遺逸紀奏兵錄猶未能備至於孝成命任宏論次兵書為四種

天文二十一家四百四十五卷

歷譜十八家六百六卷

五行三十一家六百五十二卷

著龜十五家四百一卷

雜占十八家三百一十三卷

形法六家百二十二卷

凡數術百九十家二千五百二十八卷

醫經七家二百一十六卷

經方十一家二百七十四卷

房中八家百八十六卷

神仙十家二百五卷

凡方技三十六家八百六十八卷

大凡書六畧三十八種五百九十六家萬三千二百六

十九卷

並藝文志

雜錄

漢元年高祖入關蕭何盡收秦丞相府圖籍文書

本紀

惠帝四年除挾書律

本紀

御史中丞在殿中蘭臺掌圖籍秘書

百官表臣天麟謹按通典云漢凡圖

書所在有石渠石室延閣廣內貯之於外府又有御史中丞居殿中掌蘭臺秘書及麒麟天祿二閣藏之於內

禁

成帝河平三年劉向校中秘書謁者陳農使使求遺書

於天下

本紀臣天麟按劉歆七畧云外則有太常太史博士之藏內則有延閣廣內秘丞之府

史記石室金匱之書

司馬遷傳

蘓昌為太常坐籍霍山書泄秘書免

百官表師古曰以秘書借霍山

霍山坐寫秘書自殺

光傳

河間獻王脩學好古實事求是從民得善書必為好寫
與之留其真加金帛賜以招之繇是四方道術之人不
遠千里或有先祖舊書多奉以奏獻王者故得書多與
漢朝等是時淮南王安亦好書所招致率多浮辯獻王
所得書皆古文先秦舊書周官尚書禮禮記孟子老子
之屬皆經傳說記七十子之徒所論其學舉六藝立毛
氏詩左氏春秋博士脩禮樂被服儒術造次必於儒者
山東諸儒者從而遊

本傳

講論經義

附校讎

瑕丘江公受穀梁春秋及詩於魯申公傳子至孫為博士武帝時江公與董仲舒並仲舒通五經能持論善屬文江公呐於口上使與仲舒議不如仲舒而丞相公孫弘本為公羊學比輯其議卒用董生於是上因尊公羊家詔太子受公羊春秋由是公羊大興太子既通復私問穀梁而善之其後寢微唯魯榮廣王孫皓星公二人受焉廣盡能傳其詩春秋高材敏捷與公羊大師眭孟等

論數困之故好學者頗復受穀梁沛蔡千秋少君梁周
慶幼君丁姓子孫皆從廣受千秋又事皓星公為學最
篤宣帝即位聞衛太子好穀梁春秋以問丞相韋賢長
信少府夏侯勝及侍中樂陵侯史高皆魯人也言穀梁
子本魯學公羊氏迺齊學也宜興穀梁時千秋為郎名
見與公羊家並說上善穀梁說擢千秋為諫大夫給事
中後有過左遷平陵令復求為穀梁者莫及千秋上愍
其學且絕迺以千秋為郎中戶將選郎十人從受汝南

尹更始翁君本自事千秋能說矣會千秋病死召江公
孫為博士劉向以故諫大夫通達待詔受穀梁欲令助
之江博士復死迺召周慶丁姓待詔保宮使卒授十人
自元康中始講至甘露元年積十餘歲皆明習迺召五
經名儒太子太傅蕭望之等大議殿中平公羊穀梁同
異各以經處是非時公羊博士嚴彭祖侍郎申輓伊推
宋顯穀梁議郎尹更始待詔劉向周慶丁姓並論公羊
家多不見從願請內侍郎許廣使者亦並內穀梁家中

郎王亥各五人議三十餘事望之等十一人各以經誼

對多從穀梁由是穀梁之學大盛

儒林傳

孝宣甘露三年三月詔諸儒論五經同異太子太傅蕭

望之等平奏其議上親稱制臨決焉

紀

韋玄成拜淮揚中尉受詔與蕭望之及五經諸儒雜論

同異於石渠閣條奏其對

玄成傳臣天麟謹按三輔黃圖云石渠閣蕭何造其下龍

石為渠以導水若今御溝因為閣名所藏入關所得秦之圖籍至成帝又於此藏書焉天祿藏閣藏典籍之所

漢宮殿疏云天祿麒麟閣蕭何造以藏書處賢才也

施讎受王孫易為博士甘露中與五經諸儒雜論同異

於石渠閣

本傳

梁丘臨傳賀易甘露中奉使問諸儒於石渠

梁丘賀傳

歐陽地餘傳尚書為博士論石渠

歐陽生傳

林尊為博士論石渠

尊傳

周堪與孔霸俱事大夏侯勝論於石渠經為最高

堪傳

張山拊事小夏侯建為博士論石渠

本傳

張生薛廣德以魯詩論石渠

王式傳

戴德號大戴聖號小戴以博士論石渠

孟卿傳

聞人通漢以太子舍人論石渠上

劉向受穀梁講論五經於石渠

本傳注云三輔舊事石渠閣在未央宮大殿北

以藏
秘書

五經雜議十八篇

書議奏四十二篇

禮議奏三十八篇

春秋議奏三十九篇

論語議奏十八篇

並見藝文志注云
宣帝時石渠論

少府五鹿充宗貴幸為梁丘易自宣帝時善梁丘氏說

元帝好之欲考其異同令充宗與諸易家議充宗乘貴
辯口諸儒莫能與抗皆稱疾不敢會有薦朱雲者召入
攝齋登堂抗首而請音動左右既論難連柱五鹿君故
諸儒為之語曰五鹿嶽嶽朱雲折其角繇是為博士

朱雲

傳

成帝河平三年詔光祿大夫劉向校經傳諸子詩賦步
兵校尉任宏校兵書太史令尹咸校數術侍醫李柱國
校方技每一書已向輒條其篇目撮其指意錄而奏之

會向卒子歆卒父業歆於是總羣書而奏其七畧有輯畧有六藝畧有諸子略有詩賦略有兵書略有術數略

有方技略

藝文志

班伯受詩於師丹大將軍王鳳薦伯宜勸學召見宴昵殿容貌甚麗誦說有法拜為中常侍時上方鄉學鄭寬中張禹朝夕入說尚書論語於金華殿中詔伯受焉既通大義又講異同於許商遷奉車都尉數年金華之業

絕出

叙傳

楊雄校書天祿閣傳

本

國史

楚漢春秋九篇

陸賈所傳

高祖傳十三篇

高祖與大臣述古語及詔策也

孝文傳十一篇

文帝所稱及詔策

大史公百三篇

十篇有錄無書

馮商所續大史公七篇

商受詔續

漢著記百九十卷

師古曰若今之起居注

漢大年紀五篇

已上並藝文志

史記石室金鐫之書

司馬遷傳

柱下方書

張蒼為御史主柱下方書

太常屬官有太史令丞

司馬氏世典周史至談為大史公大史公仕於建元元

封之間

如淳曰漢儀注大史公武帝置位在丞相上天

下計書先上大史公副上丞相序事如古春秋遷死後宣帝以其官為令行大史公文書而已晉灼曰百官表無大史公在丞相上又衛宏所說多不實未可以為正師古曰談為大史令耳遷尊其父故謂之為公如說非也

大史公既掌天官不

治民有子曰遷遷生龍門耕牧河山之陽年十歲則誦
古文二十而南遊江淮上會稽探禹穴窺九疑浮沅湘
北涉汶泗講業齊魯之都觀夫子遺風鄉射鄒嶧阨困
鄒薛彭城過梁楚以歸於是遷仕為郎中奉使西征巴
蜀以南略邛笮昆明還報命是歲天子始建漢家之封
而太史公留滯周南不得與從事發憤且卒而子遷適
反見父於河雒之間大史公執遷手而泣曰予先周室
之大史也自上世嘗顯功名虞夏典天官事後世中衰

絕於予乎女復為大史則續吾祖矣今天子接千歲之
統封泰山而予不得從行是命也夫命也夫子死爾必
為太史毋忘吾所欲論著矣且夫孝始於事親中於事
君終於立身揚名於後世以顯父母此孝之大也夫天
下稱周公言其能論歌文武之德宣周召之風達大王
王季思慮爰及公劉以尊后稷也幽厲之後王道缺禮
樂衰孔子脩舊起廢論詩書作春秋則學者至今則之
自獲麟以來四百有餘歲而諸侯相兼史記放絕今漢

興海內一統明主賢君忠臣義士予為大史而不論載
廢天下之文予甚懼焉爾其念哉遷俯首流涕曰小子
不敏請悉論先人所次舊聞不敢闕卒三歲而遷為大
史令紬史記石室金縢之書五年而當大初元年十一
月甲子朔旦冬至天歷始改建於明堂諸神受紀大史
公曰先人有言自周公卒五百歲而有孔子孔子至於
今五百歲有能紹而明之正易傳繼春秋本詩書禮樂
之際意在斯乎意在斯乎小子何敢讓焉於是論次其

欽定四庫全書

西漢會要
卷二十六

十二

文卒述陶唐以來至於麟止自黃帝始逮漢繼五帝末
流接三代絕業周道既廢秦撥去古文焚滅詩書故明
堂石室金鑕玉版圖籍散亂漢興蕭何次律令韓信申
軍法張倉為章程叔孫通定禮儀則文學彬彬稍進詩
書往往間出自曹參薦蓋公言黃老而賈誼朝錯明申
韓公孫弘以儒顯百年之間天下遺文古事靡不畢集
大史公仍父子相繼纂其職曰於戲余維先人嘗掌斯
事顯於唐虞至於周復典之故司馬氏世主天官至於

余乎欽念哉罔羅天下放失舊聞王迹所興原始察終
見盛觀衰論考之行事略三代錄秦漢上記黃帝下至
於茲著十二本紀既科條之矣並時異世年差不明作
十表禮樂損益律歷改易兵權山川鬼神天人之際承
敝通變作八書二十八宿環北辰三十輻共一轂運行
無窮輔弼股肱之臣配焉忠信行道以奉主上作三十
世家扶義倣儻不令已失時立功名於天下作七十列
傳凡百三十篇五十二萬六千五百字為大史公書序

略以拾遺補藝成一家言協六經異傳齊百家雜語藏之名山副在京師以俟後聖君子而十篇闕有錄無書

張晏曰遷沒之後亡景紀武紀禮書樂書兵書漢興以來將相年表日者列傳三王世家龜策列傳傳斲列傳元成之間褚先生補闕作武帝紀三王世家龜策日者傳言辭鄙陋非遷本意也師古曰序日本無兵書張云亡失此說非也劉奉世曰兵書即歷書蓋當時有二名耳

遷既死後其書稍出宣帝

時遷外孫平通侯楊惲祖述其書遂宣布焉

司馬遷傳

賜書

諸侯王求書附

班固進讀羣書成帝賜以秘書之副

叙傳

東平思王來朝上疏求諸子及太史公書上以問大將
軍王鳳對曰臣聞諸侯朝聘考文章正法度非禮不信
今東平王幸得來朝不思制節謹度以防危失而求諸
書非朝聘之義也諸子書或反經術非聖人或明鬼神
信物怪大史書有戰國從橫權譎之謀漢興之初謀臣
奇策天官災異地形扼塞皆不宜在諸侯王不可予不
許之辭宜曰五經聖人所制萬事靡不畢載王審樂道
傳相皆儒者旦夕講誦足以正身虞意夫小辯破義

小道不通致遠恐泥皆不足以留意諸益於經術者不
愛於王對奏天子如鳳言遂不與

宣元六
王傳

黜百家

孝武初立卓然罷黜百家表章六經

本
贊

董仲舒對策曰春秋大一統者天地之常經古今之通
誼也今師異道人異論百家殊方意指不同是以上亡
以持一統法制數變人不知所守臣愚以為諸不在六
藝之科孔子之術者勿使並進邪辟之說滅息然後統

紀可一而法度可明民知所從矣

傳

建元元年丞相綰奏所舉賢良或治申商韓非蘇秦張

儀之言亂國政請皆罷奏可

武紀

西漢會要卷二十六

欽定四庫全書

西漢會要卷二十七

宋 徐天麟 撰

運歷上

五運

正朔服色附

自齊威宣時騶子之徒論著終始五德之運

如淳曰今其書有五

德終始五德各以所勝為行秦謂周為火德滅火者水故自謂水德師古曰騶子即騶衍

及秦帝而

齊人奏之故始皇采之

郊祀志

秦兼天下頗推五勝而自以為獲水德乃以十月為正
色上黑漢興方綱紀大基庶事草創襲秦正朔以北平
侯張倉言用顓帝歷然正朔服色未覩其真云云

律歷志

高祖立為沛公旗幟皆赤由所殺蛇白帝子所殺者赤

帝子故也

本紀

漢承堯運德祚已盛斷蛇著符旗幟尚赤協於火德自

然之應得天統矣

高帝贊

漢興高祖曰北時待我而起亦自以為獲水德之瑞雖

明習歷及張倉等咸以為然是時天下初定方綱紀本

基高后女主皆未遑故襲秦正朔服色

歷書

文帝時賈誼以為漢興二十餘年宜當改正朔易服色
度迺草具儀其儀法色上黃數用五帝謙遜未遑也

本傳

文帝十六年魯人公孫臣上書曰始秦得水德及漢受
之推終始傳則漢當土德土德之應黃龍見宜改正朔
服色上黃張蒼以為漢迺水德之時河決金隄其符也

三始冬十月色外黑內赤與德相應公孫臣言非是罷之明年黃龍見成紀文帝召公孫臣拜為博士與諸生曰明土德草改歷服色事新垣平玉杯詐覺是後文帝

急於改正服鬼神之事

郊祀志

武帝即位天下又安縉紳之屬皆望天子封禪改正度也趙綰王臧議草改歷服色事未就竇太后不好儒術

使人按綰臧自殺

郊祀志

元封七年司馬遷等言歷紀壞廢宜改正朔是時御史

大夫兒寬明經術上迺詔寬曰今宜何以為正朔服色
何上寬與博士賜等議皆曰帝王必改正朔易服色所
以明受命於天也創業變改制不相復推傳序文則今
夏時也於是迺詔以七年為元年

律歷志

太初元年夏五月正歷以正月為歲首色上黃數用五

張晏曰漢據土德
土數五故用五

定官名協音律

紀

班固曰漢興之初庶事草創唯一叔孫生略定朝廷之
儀若迺正朔服色郊望之事數世猶未章焉至於孝文

始以夏郊而張蒼據水德公孫臣賈誼更以為土德卒不能明孝武之世文章為盛太初改制而兒寬司馬遷等猶從臣誼之言服色度數遂順黃德彼以為五德之傳從所不勝秦在水德故漢據土而克之劉向父子以為帝出于震故庖羲氏始受木德其後以母傳子終而復始自神農黃帝下歷唐虞三代而漢得火焉故高祖始起神母夜號著赤帝之符旗章遂赤自得天統矣昔共工氏以水德間于木火與秦同運非其次序故

皆不永由是言之祖宗之制蓋有自然之應順時宜矣

郊祀

志贊

歷

漢興方綱紀大基庶事草創襲秦正朔以北平侯張倉
言用顓帝歷比於六歷疏濶中最为微近然正朔服色
未覩其真而朔晦月見弦望滿虧多非是至武帝元封
七年漢興百二歲矣大中大夫公孫卿壺遂太史令司
馬遷等言歷紀壞廢宜改正朔是時御史大夫兒寬明

欽定四庫全書

西漢會要
卷二十七

四

經術上迺詔寬曰與博士共議今宜何以為正朔服色
何上寬與博士賜等議皆曰帝王必改正朔易服色所
以明受命於天也創業變改制不相復推傳序文則今
夏時也臣等聞學褊陋不能明陛下躬聖發憤詔配天
地臣愚以為三統之制後聖復前聖者二代在前也今
二代之統絕而不序矣唯陛下發聖德宣考天地四時
之極則順陰陽以定大明之制為萬世則於是迺詔御
史曰迺者有司言歷未定廣延宣問以考星度未能讎

也蓋聞古者黃帝合而不死名察發歛定清濁起五部
建氣物分數然則上矣書缺樂弛朕甚難之依違以惟
未能修明其以七年為元年遂詔卿遂遷與侍郎尊大
典星射姓等議造漢歷迺定東西立晷儀下漏刻以追
二十八宿相距於四方舉終以定朔晦分至躔離弦望
迺以前歷上元泰初四千六百一十七歲至於元封七
年復得闕逢攝提格之歲中冬十一月甲子朔旦冬至
日月在建星大歲在子巳得太初本星度新正姓等奏

不能為算願募治厯者更造密度各自增減以造漢太
初厯迺選治厯鄧平及長樂司馬可酒泉侯宜君侍郎
尊及與民間治厯者凡二十餘人方士唐都巴郡落下
閎與焉都分天部而閎運算轉厯其法以律起厯曰律
容一龠積八十一寸則一日之分也與長相終律長九
寸百七十一分而終復三復而得甲子夫律陰陽九六
爻象所從出也故黃鐘紀元氣之謂律律法也莫不取
法焉與鄧平所治同於是皆觀新星度日月行更以算

推如閏平法法一月之日二十九日八十一分日之四
十三先藉半日名曰陽厯不藉名曰陰厯所謂陽厯者
先朔月生陰厯者朔而後月迺生平曰陽厯朔皆先旦
月生以朝諸侯王羣臣便迺詔遷用鄧平所造八十一
分律厯罷廢尤疏遠者七十家復使校律厯昏明官者
淳于陵渠復覆太初厯晦朔弦望皆最密日月如合璧
五星如連珠陵渠奏狀遂用鄧平厯以平為太史丞後
二十七年元鳳三年太史令張壽王上書言厯者天地

之大紀上帝所為傳黃帝調律歷漢元年以來用之今陰陽不調宜更歷之過也詔下主歷使者鮮于妄人詰問壽王不服妄人請與治歷大司農中丞麻光等二十餘人雜候日月晦朔弦望八節二十四氣鈞校諸歷用狀奏可詔與丞相御史大將軍右將軍史各一人雜候上林清臺課諸歷疏密凡十一家以元鳳三年十一月朔旦冬至盡五年十二月各有第壽王課疏遠案漢元年不用黃帝調歷壽王非漢歷逆天道非所宜言大不

敬有詔勿劾復候盡六年大初歷第一即墨徐萬且長
安徐禹治大初歷亦第一壽王及待詔李信治黃帝調
歷課皆疏濶又言黃帝至元鳳三年六千餘歲丞相屬
寶長安單安國安陵栢育治終始言黃帝以來三千六
百二十九歲不與壽王合壽王又移帝王錄舜禹年歲
不合人年壽王言伯益為天子代禹驪山女亦為天子
在殷周間皆不合經術壽王迺太史官殷歷也壽王猥
曰安得五家歷又妄言太初歷虧四分日之三去小餘

七百五分以故陰陽不調謂之亂世劫壽王吏八百石
古之大夫服儒衣誦不祥之辭作妖言欲亂制度不道
奏可壽王候課比三年下終不服再劾死更赦勿劾遂
不更言誹謗益甚竟以下吏故歷本之驗在於天自漢
歷初起盡元鳳六年三十六歲而是非堅定至孝成世
劉向總六歷列是非作五紀論向子歆究其微眇作三
統歷及譜以說春秋推法密要故述焉

律歷志

漢興高祖曰北時待我而起亦自以為獲水德之瑞雖

明習歷及張倉等咸以為然是時天下初定方綱紀大
基高后女主皆未遑故襲秦正朔服色至孝文時魯人
公孫臣以終始五德上書言漢得土德宜更元改正朔
易服色當有黃龍見事下丞相張倉張倉亦學律
歷以為非是罷之其後黃龍見成紀張倉自黜所欲論
著不成而新垣平以望氣見頗言正歷服色事貴幸後
作亂故孝文帝廢不復問至今上即位招致四方士唐
都分天部

漢書音義曰謂分二十八宿為距度

而巴郡落下閎運算轉歷然

後日辰之度與夏正同乃改元更官號封泰山因詔御史曰乃者有司言星度之未定也廣延宣問以理星度未能讐也蓋聞昔者黃帝合而不死名察度驗定清濁

起五部建氣物分數

應劭曰言黃帝造歷得仙名節會察寒暑致啓閉分至定清濁起五

部五部金木水火土也建氣物分數皆叙歷之意也孟康曰合作也黃帝作歷歷終復始無窮已故曰不死清濁律聲之清濁也五部五行也天有四時分為五行也氣二十四氣物萬物也分歷數之分也瓚曰黃帝聖德與虛合契升龍登仙於天故曰合而不死題然則尚矣名宿度候察進退謂三辰之度吉凶之驗也

書缺樂弛朕甚閔焉朕唯未能循明也紬績日分率應

水德之勝

徐廣曰蓋以為土德土勝水

今日順夏至黃鐘為宮林鐘

為太簇為商南呂為羽姑洗為角自是以後氣復正羽聲復清名復正變以至子日當冬至則陰陽離合之道行焉十一月甲子朔旦冬至已詹其更以七年為太初元年年名焉逢攝提格

徐廣曰歲陰在寅左行歲星在丑右行

月名畢聚

日得甲子夜半朔旦冬至

歷書

元始中王莽秉政欲耀名譽召天下通知鐘律者百餘人使羲和劉歆典領條奏言之最詳故刪其偽辭取正

欽定四庫全書

西漢會要
卷二十七

義著于篇

律歷
志

漢高祖皇帝著紀伐秦繼周木生火故為火德天下號
曰漢距上元年十四萬三千二十五歲歲在大棣之東
并二十二度鶉首之六度也故漢志曰歲在大棣名曰
敦牂太歲在午

八年十一月乙巳朔旦冬至楚元三年也故殷歷以為
丙午距元朔七十六歲

著紀高帝即位十二年

惠帝著紀即位七年

高后著紀即位八年

文帝前十六年後七年著紀即位二十三年

景帝前七年中六年後三年著紀即位十六年

武帝建元元光元朔各六年元朔六年十一月甲申朔旦冬至殷歷以為乙酉距元初七十六歲元狩元鼎元封各六年漢歷太初元年距上元十四萬三千一百二十七歲前十一月甲子朔旦冬至歲在星紀婺女六度

故漢志曰歲名困敦正月歲星出婺女太初天漢太始
征和各四年後二年著紀即位五十四年

昭帝始元元鳳各六年元平一年著紀即位十三年

宣帝本始地節元康神爵五鳳甘露各四年黃龍一年
著紀即位二十五年

元帝元初二年十一月癸亥朔旦冬至殷歷以為甲子
以為紀首是歲也十月日食非合辰之會不得為紀首
距建武七十六歲初元永光建昭各五年竟寧一年著

紀即位十六年

成帝建始河平陽朔鴻嘉永始元延各四年綏和二年
著紀即位二十六年

哀帝建平四年元壽二年著紀即位六年

平帝著紀即位元始五年以宣帝玄孫嬰為嗣謂之孺
子著紀新都侯王莽居攝三年王莽居攝盜襲帝位竊
號曰新室始建國五年天鳳六年地皇三年著紀盜位
十四年更始帝著紀以漢宗室滅王莽即位二年赤眉

賊立宗室劉盆子滅更始帝自漢元年訖更始二年凡

二百三十歲

並律
歷志

改元

文帝十六年新垣平言上曰闕下有寶玉氣來者已視之果有獻玉杯者刻曰人主延壽平又言臣候日再中

居頃之日却復中於是始更以十七年為元年

郊祀志

武帝建元元年

本紀師古曰自古帝王未有年號始起於此劉攽曰封禪書云其後二年有司

言元宜以天瑞命不宜以一二數推所謂其後三年者蓋盡元符六年至元鼎三年也然元鼎四年方得寶鼎

又無緣先三年而稱之以此而言自元鼎以前之元皆有司所追命其實年號之起在元鼎耳故元封改元則始有詔

書矣

有司言元宜以天瑞不宜以一二數一元曰建二元以

長星曰光今郊得一角獸曰狩云

郊祀志

元封元年詔曰朕以眇身承至尊兢兢焉惟德菲薄不明于禮樂故用事八神遭天地况施著見景象胥然如有聞震于怪物欲止不敢遂登封泰山至于梁父然後升壇肅然自新嘉與士大夫更始其以十月為元封元

年武紀

元封七年漢興百二歲矣大中大夫公孫卿壺遂太史令司馬遷等言歷紀壞廢宜改正朔是時御史大夫兒寬明經術上迺詔寬曰與博士共議今宜何以為正朔服色何上寬與博士賜等議皆曰帝王必改正朔易服色所以明受命於天也創業變改制不相復推傳序文則今夏時也臣等聞學褊陋不能明陛下躬聖發憤昭配天地臣愚以為三統之制後聖復前聖者二代在前

也今二代之統絕而不序矣唯陛下發聖德宣考天地
四時之極則順陰陽以定大明之制為萬世則於是迺
詔御史曰迺者有司言歷未定廣延宣問以考星度未
能讎也蓋聞古者黃帝合而不死名察發斂定清濁起
五部建氣物分數然則上矣書缺樂弛朕甚難之依違
以惟未能修明其以七年為元年

律歷
志

宣帝神爵元年詔曰朕承宗廟戰戰栗栗惟萬事統未
燭厥理迺元康四年嘉穀元稷降于郡國神爵仍集金

芝九莖產於涵德殿銅池中九真獻奇獸南郡獲白鹿
威鳳為寶朕之不明震於珍物飭躬齊精祈為百姓東
濟大河天氣清靜神魚舞河幸萬歲宮神爵翔集朕之
不德懼不能任其以五年為神爵元年

紀本

元帝竟寧元年春正月匈奴虜韓邪單于來朝詔曰匈
奴郅支單于背叛禮義既伏其辜虜韓邪單于不忘恩
德鄉慕禮義復修朝賀之禮願保塞傳之無窮邊垂長
無兵革之事其改元為竟寧

紀本

成帝河平元年春三月詔曰河決東郡流漂二州校尉

王延世隄塞輒平其改元為河平

本紀

河平四年火生石中改元為陽朔

紀

哀帝建平二年待詔夏賀良等言赤精子之讖漢家歷
運中衰當再受命宜改元易號詔曰漢興二百載歷數
開元皇天降非材之佑漢國再獲受命之符朕之不德
昌敢不通夫基事之元命必與天下自新其大赦天下
以建平二年為太初元年號曰陳聖劉大平皇帝漏刻

以百二十為度八月詔曰待詔夏賀良等建言改元易號增益漏刻可以永安國家朕過聽賀良等言冀為海內獲福卒亡嘉應皆違經背古不合時宜六月甲子制書非赦令也皆蠲除之賀良等反道惑衆下有司皆伏

辜

本紀

西漢會要卷二十七

欽定四庫全書

西漢會要卷二十八

宋 徐天麟 撰

運歷下

天文

漢元年十月五星聚東井

三年秋大白出西方有光幾中乍北乍南過期迺入辰
星出四孟

七年月暈圍參畢七重

十二年春熒惑守心

孝惠二年天開東北廣十餘丈長二十餘丈

孝文後二年正月壬寅天橈夕出西南其四月乙巳水
木火三合于東井八月天狗下梁墜其十一月戊戌土
水合于危其七月火東行行畢陽環畢東北出而西逆
行至昴即南迺東行

孝景元年正月癸酉金水合于婺女其七月乙丑金木

水三合於張其二年七月丙子火與水晨出東方因守
斗其十二月水火合於斗是歲彗星出西南七月天狗
下

三年填星在婁幾入還居奎

四年七月癸未火入東井行陰又以九月己未入輿鬼
戊寅出

中元年填星當在觜觿參去東井其三年正月丁亥
金木合為觜觿其三月丁酉彗星夜見西北色白長丈

在紫艸旦去益小十五日不見其五月甲午金木俱在
東井戌金去木留守之二十日其六月壬戌蓬星見
西南在房南去房可二丈大如二斗器色白癸亥在心
東北可長丈所甲子在尾北可六丈丁卯在箕北近漢
稍小旦去時大如桃土申去凡十日

中三年十一月庚午夕金火合於虛相去一寸

四年四月丙申金木合於東井其五年四月乙巳水火
合於參

後元年五月壬午火金合於輿鬼之東北不至柳出輿
鬼北可五寸

孝武建元三年三月有星孛于注張歷太微干紫宮至
於天漢

三年四月有星孛於天紀至織女

六年熒惑守輿鬼

元光元年六月客星見于房

元光中天星盡捨

元鼎五年太白入于天苑

元鼎中熒惑守南斗

元封中星孛于河戍

太初中星孛于招搖

孝昭始元中蓬星出西方天市東門行過河鼓入營室
中後太白出西方下行一舍復上行二舍而下去後太
白出東方入咸池東下入東井後太白入太微西藩第
一星北出東藩第一星北東下去後太白入昴後熒惑

出東方守太白後流星下燕萬載宮極東去

元鳳四年九月客星在紫宮中斗樞極間

五年四月燭星見奎婁間

元平元年正月庚子日出時有黑雲狀如焱風亂鬢轉
出西北東南行轉而西有頃亡

二月甲申晨有大星如月有衆星隨而西行乙酉祥雲
如狗赤色長尾三枚夾漢西行

三月丙戌流星出翼軫東北于太微入紫宮始出小旦

入大有光入有頃聲如雷三鳴止

孝宣本始元年四月壬戌甲夜辰星與參出西方其二
年七月辛亥夕辰星與翼出皆為蚤其後熒惑守房之
鉤鈴

四年七月甲辰辰星在翼月犯之是日熒惑入輿鬼天
質

地節元年正月戊午乙夜月食熒惑熒惑在角亢其六
月戊戌甲夜客星又居左右角間東南指長可二尺色

白其丙寅又有客星見貫索東北南行至七月癸酉夜入天市芒炎東南指其色白

黃龍元年三月客星居王梁東北可九尺長丈餘西指出閣道間至紫宮

元帝元初元年四月客星大如瓜色青白在南斗第二星東可四尺

二年五月客星見昴分居卷舌東可五尺青白色炎長三寸

五年四月彗星出西北赤黃色長八尺所後數日長丈餘東北指在參分

孝成建始元年九月戊子有流星出文昌色白光燭地長可四丈大一圍動搖如龍蛇形有頃長可五六丈大四圍所訕折委曲貫紫宮西在斗西北子亥間後訕如環北方不合留一刻所

四年七月熒惑隕歲星居其東北半寸所如連李時歲星在關星西四尺所熒惑初從畢口大星東東北住數

日至往疾去遲

四年十一月乙卯月食填星星不見時在輿鬼西北八九尺所

河平二年十月下旬填星在東井軒轅南端大星尺餘
歲星在其西北尺所熒惑在其西北二尺所皆從西方
來填星貫輿鬼先到歲星次熒惑亦貫輿鬼十一月上
旬歲星熒惑西去填星皆西北逆行

陽朔元年七月壬子月犯心星

四年閏月庚午飛星大如缶出西南入斗下

永始元年二月癸未夜東方有赤色大三四圍長二三丈索索如樹南方有大四五圍下行十餘丈皆不至地滅

元延元年四月丁酉日蝕時天暝晏殷殷如雷聲有流星頭大如缶長十餘丈皎然赤白色從日下東南去四面或大如盂或如鷄子燿燿如雨下至昏止

綏和元年正月辛未有流星從東南入北斗長數十丈

二刻所息

二年春熒惑守心

哀帝建平元年正月丁未日出時有著天白氣廣如一匹布長十餘丈西南行驩如雷一刻而止名曰天狗十二月白氣出西南從地上至天出參下貫天廁廣如一匹布長十餘丈十餘日去

二年二月彗星出牽牛七十餘日

元壽元年十一月歲星入太微逆行干右執法

並天文志

權量

張倉定章程

高紀如淳曰章程數之章術也程者權衡丈尺斗斛之平法也

一曰備數二曰和聲三曰審度四曰嘉量五曰權衡數者一十百千萬也所以算數事物順性命之理也夫推歷生律制器規圓矩方權重衡平準繩嘉量探頤索隱鈎深致遠莫不用焉度長短者不失毫釐量多少者不失圭撮權輕重者不失黍絊其法在算術職在太史義和掌之

聲者宮商角徵羽也職在大樂太常掌之

度者分寸尺丈引也所以度長短也本起黃鐘之長以子穀秬黍中者一黍之廣度之九十分黃鐘之長一為一分十分為寸十寸為尺十尺為丈十丈為引而五度審矣其法用銅高一寸廣二寸長一丈而分寸尺丈存焉用竹為引高一分廣六分長十丈其法方矩高廣之數陰陽之象也分者自三微而成著可分別也寸忖也尺者隻也丈者張也引者信也夫度者別於分寸於寸

獲於尺張於丈信於引引者信天下也職在內官廷尉掌之

量者龠合升斗斛所以量多少也本起於黃鐘之龠用度數審其容以子穀秬黍中者千有二百實其龠以井水準其澁十龠為合十合為升十升為斗十斗為斛而五量嘉矣其法用銅方尺而圓其外旁有飛焉其上為斛其下為斗左耳為升右耳為合龠其狀似爵以縻爵祿上三下二參天兩地圜而函方左一右二陰陽之象

也其圜象規其重二鈞備氣物之數合萬有一千五百二十聲中黃鐘始於黃鐘而反覆焉君制器之象也龠者黃鐘律之實也躍微動氣而生物也合者合龠之量也升者登合之量也斗者聚升之量也斛者角斗平多少之量也夫量者躍於龠合於合登於升聚於斗角於斛職在大倉大司農掌之

衡權者衡平也權重也衡所以任權而均物平輕重也其道如底以見準之正繩之直左旋見規右折見矩其

在天也佐助旋璣斟酌建指以齊七政故曰玉衡論語
曰立則見其參於前也在車則見其倚於衡也又曰齊
之以禮此衡在前居南方之義也權者銖兩斤鈞石也
所以稱物平施知輕重也本起於黃鐘之重一龠容千
二百黍重十二銖兩之為兩二十四銖為兩十六兩為
斤三十斤為鈞四鈞為石付為十八易十有八變之象
也五權之制以義立之以物鈞之其餘小大之差以輕
重為宜圜而環之令之肉倍好者周旋無端終而復始

無窮已也銖者物繇忽微始至於成著可殊異也兩者
兩黃鐘律之重也二十四銖而成兩者二十四氣之象
也斤者明也三百八十四銖易二篇之爻陰陽變動之
象也十六兩成斤者四時乘四方之象也鈞者均也陽
施其氣陰化其物皆得其成就平均也權與物均重萬
一千五百二十銖當萬物之象也四百八十兩者六旬
行八節之象也三十斤成鈞者一月之象也石者大也
權之大者也始於銖兩於兩明於斤均於鈞終於石物

終石大也四鈞為石者四時之象也重百二十斤者十二月之象也終于十二辰而復于子黃鐘之象也千九百二十兩者陰陽之數也三百八十四爻五行之象也四萬六千八十銖者萬一千五百二十物歷四時之象也而歲功成就五權謹矣權與物鈞而生衡衡運生規規圓生矩矩方生繩繩直生準準正則平衡而鈞權矣是為五則規者所以規圓器械令得其類也矩者所以矩方器械令不失其形也規矩相須陰陽位序圓方乃

成準者所以揆平取正也。繩者上下端直經緯四通也。
準繩連體衡權合德百工繇焉以定法式。

凡律度量衡用銅者名自名也。所以同天下齊風俗也。
銅為物之至精不為燥濕寒暑變其節不為風雨暴露
改其形介然有常有似於士君子之行是以用銅也用
竹為引者事之宜也。

並律
應志

時令

文帝元年詔曰方春和時草木羣生之物皆有以自樂

而吾百姓鰥寡孤獨窮困之人或陷於死亡而莫之省

憂為民父母將如何其議所以振貸之

本紀

宣帝時魏相表采易陰陽及月令明堂奏之臣聞易曰
天地以順動故日月不過四時不忒聖王以順動故刑
罰清而民服天地變化必繇陰陽陰陽之分以日為紀
日冬至則八風之序立萬物之性成各有常職不得
相干東方之神大昊乘震執規司春南方之神炎帝乘
離執衡司夏西方之神少昊乘兌執矩司秋北方之神

顓帝乘坎執權司冬中央之神黃帝乘坤艮執繩司下
土茲五帝所司各有時也東方之卦不可以治西方南
方之卦不可以治北方春興兌治則饑秋興震治則華
冬興離治則泄夏興坎治則雹明王謹於尊天重於養
人故立羲和之官以乘四時節授民事君動靜以道奉
順陰陽則日月光明風雨時節寒暑調和三者得叙則
灾害不生五穀熟絲麻遂中木茂鳥獸蕃民不夫疾衣
食有餘若是則君尊民說上下亡怨政教不違禮遜可

興夫風雨不時則傷農桑農桑傷則民饑寒饑寒在身則亡廉恥寇賊姦宄所繇生也臣愚以為陰陽者王事之本羣生之命自古賢聖未有不繇者也天子之義必純取法天地而觀于先聖高祖所述書天子所服第八曰大謁者臣章受詔長樂宮曰令羣臣議天子所服以安治天下相國臣何御史大夫臣昌謹與將軍臣陵太子太傅臣通等議春夏秋冬天子所服當法天地之數中得人和故自天子王侯有土之君下及兆民能法天

地順四時以治國家身亡禍殃年壽永究是奉宗廟安天下之大禮也臣請法之中謁者趙堯舉春李舜舉夏兒湯舉秋貢禹舉冬四人各職一時大謁者襄章奏制曰可孝文皇帝時以二月施恩惠於天下賜孝弟力田及罷軍卒祠死事者頗非時節御史大夫晁錯時為太子家令言其狀臣相伏念陛下恩澤甚厚然而災氣未息竊恐詔令有未合當時者也願陛選明經通知陰陽者四人各主一時時至明言所職以和陰陽天下幸甚

相傳

元康三年六月詔三輔毋得以春夏摘巢探卵彈射飛

鳥具為令

紀

立春行冤獄使者出

張敞傳

元帝初元三年詔百官勉之毋犯四時之禁

本紀

永光三年十一月詔曰迺者已丑地動中冬兩水大霧

盜賊並起吏何不以時禁各悉意對

本紀師古曰時禁謂月令所當禁斷

者也

甘延壽陳湯上疏斬郅支頭及名王以下宜縣頭藁街
事下有司丞相匡衡御史大夫繁延壽以為月令春掩骼
埋胔之時宜勿縣車騎將軍許嘉右將軍王商以為夾
谷之會優施笑君孔子誅之方盛夏首足異門而出宜
縣十日乃埋之有詔將軍議是

陳湯傳

建詔五年詔曰方春農桑興百姓戮力自盡之時也故
是月勞農勸民無使後時今不良之吏覆案小罪追名
證案興不急之事以妨百姓使失一時之作亡終歲之

功公卿其明察申敕之

紀

成帝陽朔二年春寒詔曰昔在帝堯立羲和之官命以四時之事令不失其序故書云黎民於變時雍明以陰陽之本也今公卿大夫或不信陰陽薄而小之所奏請多違時政傳以不知周行天下而欲望陰陽和調豈不謬哉其務順四時月令

紀

鴻嘉元年二月詔曰方春生長時臨遣諫大夫理等舉

三輔三河弘農冤獄

紀

哀帝即位李尋對曰辰星主四時四時失序則辰星作異令出於歲首之孟天所以譴告陛下也加以號令不順四時間者春三月治大獄時賊陰立逆恐歲小收季夏舉兵法時寒氣應恐後有霜雹之灾秋月行封爵其月土濕輿恐後有雷雹之變古之王者尊天地重陰陽敬四時嚴月令今朝廷忽於時月之令諸侍中尚書近臣宜皆令通知月令之意設羣下請事若陛下出令有謬於時者當知爭之以順時

傳

梁王立殺人遣廷尉大鴻臚雜問對曰冬月迫促貪生

畏死即詐僵仆陽病微幸得踰於須臾

師古曰冀得踰冬而減死謹

以實對時冬月盡其春大赦不治

本傳

孫寶以春月作詆欺免為庶人

本傳

王溫舒為河內太守捕郡中豪猾大者至族小者乃死

會春溫舒頓足嘆曰令冬月益展一月足吾事矣

本傳師古

曰立春之後不後行刑故云然

張敞收繫姘繫獄是時冬月未盡數日晝夜驗治竟致

其死敬使告舜曰五日京兆竟何如冬月已盡延命乎

敬傳

劉向坐鑄偽黃金得踰冬減死論

本傳服虔曰踰冬至春行寬大而減死罪

諸葛豐以春夏繫治人在位多言其短上迺制詔御史
豐前為司隸不順四時專作苛暴其免為庶人傳

孫寶以立秋日補侯文東部督郵入見勅曰今日鷹隼
始擊當順天氣取姦惡以成嚴霜之誅寶傳

冬月治請讞

于定國傳

冬月傳屬縣囚會論府上

嚴延年傳

平當為丞相以冬月賜爵關內侯

本傳李奇曰以冬月非封侯時故且先賜

爵關

內侯

孔光等請謁者召王嘉詣廷尉詔獄永信少府猛等十

人以為今春月寒氣錯謬霖露數降宜示天下以寬和

王嘉

傳

西漢會要卷二十八

欽定四庫全書

西漢會要卷二十九

宋 徐天麟 撰

祥異上

符瑞

高祖被酒夜徑澤中令一人行前行前者還報曰前有
大蛇當徑願還高祖醉曰壯士行何畏乃前拔劍斬蛇
蛇分為兩道開行數里醉困卧後人來至蛇所有一老

嫗夜哭人問嫗何哭嫗曰人殺吾子人曰嫗子何為見殺嫗曰吾子白帝子也化為蛇當道今者赤帝子斬之故哭人乃以嫗為不誠欲苦之嫗因忽不見紀

秦始皇帝嘗曰東南有天子氣於是東游以厭當之

高祖隱於芒碭山澤間呂后與人俱求常得之高祖怪

問之呂后曰季所居上常有雲氣故往從常得季紀

漢元年冬十月五星聚東井

紀應劭曰東井秦之分野五星所在當有聖人以義

取天

下

文帝十五年黃龍見於成紀

紀

武帝元狩元年行幸雍祠五時獲白麟作白麟之歌

二年夏馬生余吾水中南越獻馴象能言鳥

元鼎元年得鼎汾水上

四年得寶鼎后上祠旁秋馬生渥洼水中作寶鼎天馬之歌

元封二年甘泉宮內中產芝九莖連葉作芝房之歌

太始二年詔曰往者朕郊見上帝西登隴首獲白麟以

饋宗廟渥洼出天馬泰山見黃金更改故名今更黃金
為麟趾褭蹏以協瑞焉因呂頒封諸侯王

三年行幸東海獲赤雁作朱雁之歌

昭帝始元元年二月黃鵠下建章宮太液池中公卿上
壽

三年鳳凰集東海遣使者祠其處

宣帝本始元年鳳凰集膠東千乘

四年鳳凰集北海安丘淳于

地節二年四月鳳凰集魯郡羣鳥從之

元康元年詔曰迺者鳳凰集泰山陳留甘露降未央宮
朕未能章先帝休烈協寧百姓承天順地調序四時獲
蒙嘉瑞賜茲祉福夙夜兢兢靡有驕色內省匪解永惟
罔極書不云乎鳳凰來儀庶尹克諧其赦天下賜勤事
吏中二千石以下至六百石爵自中郎吏至五大夫佐
史以上二級民一級女子百戶牛酒加賜鰥寡孤獨三
老孝弟力田帛所振貸勿收

三年春以神爵數集泰山賜諸侯王丞相將軍列侯二千石金郎從官帛各有差賜天下吏爵二級民一級女子百戶牛酒鰥寡孤獨高年帛

六月詔曰前年夏神爵集雍今春五色鳥以萬數飛過屬縣翱翔而舞欲集未下其令三輔毋得以春夏撻棗探卵彈射飛鳥具為令

四年三月詔曰迺者神爵五采以萬數集長樂未央北宮高寢甘泉泰畤殿中及上林苑朕之不逮寡于德厚

屢獲嘉祥非朕之任其賜天下吏爵二級民一級女子
百戶牛酒加賜三老孝弟力田帛人二匹鰥寡孤獨各
一匹

神爵元年詔曰朕承宗廟戰戰栗栗惟萬事統未燭厥
理迺元康四年嘉穀元稷降于郡國神爵仍集金芝九
莖產于涵德殿銅池中九真獻奇獸南郡獲白鹿威鳳
為寶朕之不明震于珍物飭躬齋精祈為百姓東濟大
河天氣清靜神魚舞河幸萬歲宮神爵翔集朕之不德

懼不能任其以五年為神爵元年賜天下勤事吏爵二級民一級女子百戶牛酒鰥寡孤獨高年帛所振貸物勿收行所過毋出田租

二年二月詔曰迺者正月乙丑鳳凰甘露降集京師羣鳥從以萬數朕之不德屢獲天福祇事不怠其赦天下四年二月詔曰迺者鳳凰甘露降集京師嘉瑞並見脩興太乙五帝后土之祠祈為百姓蒙祉福鸞鳳萬舉蜚覽翱翔集止于旁齋戒之暮神光顯著薦鬯之夕神光

交錯或降于天或登于地或從四方來集于壇上帝嘉
嚮海內承福其赦天下賜民爵一級女子百戶牛酒鰥
寡孤獨高年帛

冬十月鳳凰十一集杜陵十二月鳳凰集上林

五鳳三年詔曰朕飭躬齋戒郊上帝祠后土神光並見
或興於谷燭耀齋宮十有餘刻甘露降神爵集已詔有
司告祠上帝宗廟三月辛丑鸞鳳又集長樂宮東闕中
木上飛下止地文章五色留十餘刻吏民並觀朕之不

敏懼不能任屢蒙嘉瑞獲茲祉福書不云乎雖休勿休
祇事不怠公卿大夫其勉焉減天下口錢赦殊死以下
賜民爵一級女子百戶牛酒大酺五日加賜鰥寡孤獨
高年帛

甘露元年黃龍見新豐

三年詔曰迺者鳳凰甘露降集黃龍登興醴泉滂流枯
槁榮茂神光並見咸受祺祥其赦天下減民算三十賜
諸侯王丞相將軍列侯中二千石金錢各有差賜民爵

一級女子百戶牛酒鰥寡孤獨高年帛

三年詔曰迺者鳳凰集新蔡羣鳥四面行列皆鄉鳳凰立以萬數其賜汝南太守帛百匹新蔡長吏三老孝弟力田鰥寡孤獨各有差賜民爵二級毋出今年租

成帝鴻嘉元年冬黃龍見真定

元延四年甘露降京師賜長安民牛酒

平帝元始元年越裳氏重譯獻白雉一黑雉二

二年春黃支國獻犀牛

並紀

日食

高帝三年十月甲戌晦日有食之在斗二十度

十一月癸卯晦日有食之在虛三度

九年六月乙未晦日有食之既在張十三度

惠帝七年正月辛丑朔日有食之在危十二度

五月丁卯先晦一日日有食之幾盡在七星

高后二年六月丙戌晦日有食之

七年正月己丑晦日有食之既在營室九度

文帝二年十一月癸卯晦日有食之在婺女一度

三年十月丁酉晦日有食之在斗二十二度

十一月丁卯晦日有食之在虛八度

後四年四月丙辰晦日有食之在東井十三度

七年正月辛未朔日有食之

景帝三年二月壬午晦日有食之在胃二度

七年十一月庚寅晦日有食之在虛九度

中元年十二月甲寅晦日有食之

二年九月甲戌晦日有食之

三年九月戊戌晦日有食之幾盡在尾九度

元年七月辛亥晦日有食之在軫七度

後元年七月乙巳先晦一日日有食之在翼十七度

武帝建元二年二月丙戌朔日有食之在奎十四度

三年九月丙子晦日有食之在尾二度

五年正月己巳朔日有食之

元光元年二月丙辰晦日有食之

七月癸未先晦一日日有食之在翼八度

元朔二年二月乙巳晦日有食之在胃二度

六年十一月癸丑晦日有食之

元狩元年五月乙巳晦日有食之在柳六度

元鼎五年四月丁丑晦日有食之在東井三十三度

元封四年六月己酉朔日有食之

大始元年正月乙巳晦日有食之

四年十月甲寅晦日有食之在斗十九度

征和四年八月辛酉晦日有食之不盡如鉤在亢二度
昭帝始元三年十一月壬辰朔日有食之在斗九度
元鳳元年七月己亥晦日有食之幾盡在張十二度
宣帝地節元年十二月癸亥晦日有食之在營室十五
度

元鳳元年十二月乙酉朔日有食之在婺女十度
四年四月辛丑朔日有食之在畢十九度

元帝永光二年三月壬戌朔日有食之在婁八度

四年六月戊寅晦日有食之在張七度

建昭五年六月壬申晦日有食之不盡如鉤

成帝建始三年十二月戊申朔日有食之在婺女九度
河平元年四月己亥晦日有食之不盡如鉤在東井六
度

三年八月乙卯晦日有食之在房

四年三月癸丑朔日有食之在昴

陽朔元年二月丁未晦日有食之在胃

永始元年九月丁巳晦日有食之

二年二月乙酉晦日有食之

三年正月己卯晦日有食之

四年七月辛未晦日有食之

元廷元年正月己亥朔日有食之

哀帝元壽元年正月辛丑朔日有食之不盡如鉤在營

室十度

二年三月壬辰晦日有食之

平帝元始元年五月丁巳朔日有食之在東井

二年九月戊申晦日有食之既

凡漢著紀十二世二百一十二年日食五十三朔十

四晦三十六先晦一日三

並五行志

日月變異

武帝建元二年四月戊申有如日夜出

紀

元帝永光元年四月日色青白亡景正中時有景亡光是夏寒至九月乃有光

成帝建始元年八月戊午晨漏未盡三刻有兩月重見
河平元年正月壬寅朔日月俱在營室時日出赤二月
癸未日朝赤且入又赤夜月赤甲申日出赤如血亡光
漏上四刻半乃頗有光燭地赤黃食後乃復三月乙未
日出黃有黑氣大如錢居日中央

並五行志

星孛

天文志所載已見天文類
五行志所載別見于此

高帝三年七月有星孛于大角旬餘乃入

文帝後七年九月有星孛于西方其本直尾箕末指虛

危長丈餘及天漢十六日不見

武帝建元六年六月有星孛于北方

八月長星出于東方長終天三十日去是為蚩尤旗見則王者征伐四方

元狩四年四月長星又出西北

元封元年五月有星孛于東井又孛于三台

宣帝地節元年正月有星孛于西方去太白二丈所

成帝建始元年正月有星孛于營室青白色長六七丈

廣尺餘

元延元年七月辛未有星孛于東井踐五諸侯出河戎
北率行車袁大微後日六度有餘晨出東方十三日夕
見西方犯次妃長秋斗填蠡炎再貫紫宮中大火當後
達天河除於妃后之域南逝度犯大角攝提至天市而
按節徐行炎入市中旬而後西去五十六日與蒼龍俱

伏

並五行志

星隕

成帝永始二年二月癸未夜過中星隕如雨長一二丈
繹繹未至地滅至鷄鳴止

五行志

亡冰

武帝元狩六年冬亡冰

昭帝始元二年冬亡冰

並五行志
紀作六年

雪

文帝四年六月天雨雪

景帝中六年三月雨雪

武帝元狩元年十二月大雨雪民多凍死

元鼎二年三月雪平地厚五尺

三年三月水冰四月雨雪

元帝建昭二年十一月齊楚地大雪深五尺

四年三月雨雪燕多死

並五行志

成帝建始四年夏四月雨雪

本紀

陽朔四年四月雨雪燕雀死

五行志

霜雹

武帝元光四年四月隕霜殺草木

元封三年十二月雷雨雹大如馬頭

宣帝地節四年五月山陽濟陰雨雹如鷄子深二尺五寸殺二十人蜚鳥皆死

元帝永光元年三月隕霜殺桑九月二日隕霜殺稼

成帝河平二年四月楚國雨雹大如斧蜚鳥死

並五行志

總天變

惠帝二年天雨血於宜陽一頃所

赤青

武帝建元四年有風赤如血

紀

元光五年七月大風拔木

紀

元漢元年三月天雨白毛三月八月天雨白毛

毛之種屈曲者

漢帝建始元年四月辛丑夜西北有如火光壬寅晨大風從西北起雲氣赤黃四塞天下終日夜着地者黃土

塵也

志

十二月大風拔甘泉時中大木十韋以上


本紀韋與圓同

哀帝建平四年山陽湖陵雨血廣三尺長五尺大者如

錢小者如麻子

平帝元始四年冬大風吹長安城門東屋瓦且盡

並五行志



西漢會要卷二十九